

大般若波羅蜜多經卷第四百三十

唐三藏法師玄奘奉 詔譯

第二分天來品第三十四之二

爾時天帝釋白佛言。世尊。是善男子善女人等。云何覺知。於此三千大千世界。及餘十方無邊世界。所有四大王眾天。乃至色究竟天。并餘無量有大威德諸龍。藥叉。健達縛。阿素洛。揭路荼。緊捺落。莫呼洛伽。人非人等。來至其所。觀禮讀誦。彼所書寫。甚深般若波羅蜜多。供養恭敬。尊重讚歎。合掌右繞。歡喜護念。爾時佛告天帝釋言。憍尸迦。是善男子善女人等。若見

如是甚深般若波羅蜜多所在之處。有妙光明。或聞其所異香芬馥。若天樂音。當知爾時。有大神力威德熾盛。諸天龍等。來至其所。觀禮讀誦彼所書寫甚深般若波羅蜜多。供養恭敬。尊重讚歎。合掌右繞歡喜護念。復次。憍尸迦。是善男子善女人等。修純淨行。嚴飾其處。至心供養。如是般若波羅蜜多甚深經典。當知爾時。有大神力威德熾盛。諸天龍等。來至其所。觀禮讀誦彼所書寫甚深般若波羅蜜多。供養恭敬。尊重讚歎。合掌右繞歡喜護念。憍尸迦。隨有如是具大神力威德熾盛。諸天龍等。來至其處。此中所有邪神。

惡鬼驚怖退散。無敢住者。由此因緣。是善男子善女人等。心便廣大。起淨勝解。所修善業。倍復增長。諸有所爲。皆無障礙。以是故。憍尸迦。若此般若波羅蜜多。甚深經典。隨所在處。應當周匝。除去穢物。掃拭塗治。香水散灑。敷設寶座。而安措之。燒香散華。張施幔蓋。寶幢旛鐸。閒飾其中。諸妙珍奇衣服瓔珞。金銀寶器。伎樂燈明。種種襍綵莊嚴其處。若能如是供養般若波羅蜜多。便有無量具大神力威德熾盛。諸天龍等。來至其所。觀禮讀誦。彼所書寫。甚深般若波羅蜜多。供養恭敬。尊重讚歎。合掌右繞。歡喜護念。復次憍尸

迦。是善男子善女人等。若能如是供養恭敬尊重讚
歎甚深般若波羅蜜多。決定當得身心無倦。身樂心
樂。身輕心輕。身調柔。心調柔。身安隱。心安隱。繫想般
若波羅蜜多。夜寢息時。無諸惡夢。唯得善夢。謂見如
來。應正等覺。身真金色。具三十二大丈夫相。八十隨
好。圓滿莊嚴。放大光明。普照一切。聲聞菩薩前後圍
繞。身處眾中。聞佛爲說。布施淨戒安忍精進靜慮般
若波羅蜜多相應之法。復聞爲說。內空乃至無性自
性空。四念住。廣說乃至十八不共法。相應之法。復
聞分別。布施淨戒安忍精進靜慮般若波羅蜜多相

應之義。復聞分別內空。乃至無性自性空。四念住廣說。乃至十八佛不共法相應之義。又於夢中見菩提樹。其量高廣。眾寶莊嚴。有大菩薩趣菩提樹。結跏趺坐。降伏魔怨。證得無上正等菩提。轉妙法輪。度無量眾。復見無量百千俱胝那庾多菩薩摩訶薩。論議決擇種種法義。謂應如是成熟有情。嚴淨佛土。修菩薩行。降伏魔軍。永斷障習。趣證無上正等菩提。又復夢見十方無量百千俱胝那庾多佛。亦聞其聲。謂某世界某名如來。應正等覺。若干百千俱胝那庾多菩薩摩訶薩。若干百千俱胝那庾多聲聞弟子。恭敬圍繞。

而爲說法。又復夢見十方無量百千俱胝那庾多佛。入般涅槃。彼一一佛般涅槃後。各有施主爲供養佛。設利羅故。以妙七寶各起無量百千俱胝那庾多數。諸宰堵波。復於一一宰堵波所。各以無量上妙花鬘塗散等香。衣服瓔珞寶幢旛蓋。諸妙珍奇妓樂燈明。經無量劫供養恭敬尊重讚歎。憍尸迦。是善男子善女人等。見如是類諸善夢相。若睡若覺。身心安樂。諸天神等益其精氣。令彼自覺身體輕便。由是因緣。不多貪染飲食醫藥衣服臥具。於四供養其心輕微。如瑜伽師入勝妙定。由彼定力滋潤身心。從定出已。雖

遇美饍而心輕微。此亦如是。何以故。憍尸迦。是善男子善女人等。由此三千大千世界。及餘十方無邊世界。一切如來。應正等覺。聲聞菩薩。天龍藥叉。健達縛。阿素洛。揭路荼。緊捺洛。莫呼洛伽。人非人等。具大神力。勝威德者。慈悲護念。以妙精氣。冥注身心。令其志勇體充盛。故憍尸迦。若善男子善女人等。欲得如是所有現在功德勝利。應發一切智智心。以無所得爲方便。於此般若波羅蜜多甚深經典。至心聽聞受持。讀誦精勤修學。如理思惟。書寫解說。廣令流布。憍尸迦。若善男子善女人等。雖於般若波羅蜜多甚深經

典不能聽聞受持讀誦。精勤修學如理思惟。廣爲有情宣說流布。而但書寫。眾寶嚴飾。復以種種上妙華鬘塗散等香。衣服瓔珞寶幢旛蓋。諸妙珍奇妓樂燈明。供養恭敬。尊重讚歎。亦得如前所說種種功德勝利。何以故。憍尸迦。是善男子善女人等。能廣利樂無量無邊。諸有情故。復次憍尸迦。若善男子善女人等。以應一切智智心。用無所得爲方便。於此般若波羅蜜多甚深經典。至心聽聞受持讀誦。精勤修學如理思惟。廣爲有情宣說流布。或復書寫。眾寶嚴飾。復以種種上妙花鬘。乃至燈明而爲供養。所獲福聚。無量。

無邊勝餘有情。盡其形壽。以無量種上妙飲食。衣服。臥具醫藥資緣。供養恭敬。尊重讚歎。十方世界一切。如來應正等覺。及弟子眾。亦勝十方佛及弟子。般涅槃後。有爲供養。設利羅故。以妙七寶起窣堵波。高廣巖麗。復以無量天妙華鬘。乃至燈明。盡其形壽。供養恭敬。尊重讚歎。何以故。憍尸迦。十方諸佛及弟子眾。皆因如是甚深般若波羅蜜多。而出生故。

第二分設利羅品第三十五

復次憍尸迦。假使充滿此瞻部洲佛。設利羅。以爲一分。書寫如是甚深般若波羅蜜多。復爲一分。此二分

中。汝取何者。天帝釋言。世尊。於此二分。我意寧取甚深般若波羅蜜多。所以者何。我於諸佛設利羅所。非不信受。非不欣樂。供養恭敬。尊重讚歎。然諸佛身及設利羅。皆因如是甚深般若波羅蜜多。而出生故。皆由如是甚深般若波羅蜜多。功德勢力所熏修故。乃爲一切世閒天人阿素洛等。以無量種上妙花鬘。乃至燈明。供養恭敬。尊重讚歎。時舍利子。語帝釋言。憍尸迦。甚深般若波羅蜜多。無色無見。無對一相。所謂無相。無相之法。旣不可取。汝云何取。何以故。憍尸迦。甚深般若波羅蜜多。無取無捨。無增無減。無聚無散。

無益無損。無染無淨。不與諸佛法。不與獨覺法。不與阿羅漢法。不與學法。不棄異生法。不與無爲界。不棄有爲界。不與內空。乃至無性自性空。不與四念住。廣說。乃至一切相智。不棄裸染法。時天帝釋。便報具壽舍利子言。如是如是。誠如所說。大德。若如實知甚深般若波羅蜜多。無取無捨。乃至不與一切相智。不捨裸染。是爲眞取甚深般若波羅蜜多。亦眞修行甚深般若波羅蜜多。然此般若波羅蜜多。不隨二行。無二相故。如是靜慮。乃至布施波羅蜜多。亦不隨二行。無二相故。爾時佛讚天帝釋言。善哉善哉。如汝所說。甚

深般若乃至布施波羅蜜多。皆不隨二行。何以故。憍尸迦。如是六種波羅蜜多。皆無二相故。憍尸迦。諸有欲令甚深般若乃至布施波羅蜜多。有二相者。則爲欲令法界眞如法性實際不思議界。亦有二相。何以故。憍尸迦。甚深般若乃至布施波羅蜜多。皆與法界乃至不思議界。無二無二處故。時天帝釋復白佛言。世尊。甚深般若波羅蜜多。世間天人阿素洛等。皆應至誠禮拜右繞。供養恭敬尊重讚歎。所以者何。一切菩薩摩訶薩衆。皆依般若波羅蜜多。精勤修學。證得無上正等菩提。世尊。如我坐在三十三天善法殿中。

天帝座上。爲諸天眾。宣說正法。時有無量諸天子等。來至我所。供養恭敬。尊重讚歎。右繞禮拜。合掌而去。我若不在彼法座時。諸天子等。亦來其處。雖不見我。如我在時。恭敬供養。咸言此處。是天帝釋。爲諸天等。說法之座。我等皆應。如天主在。供養右繞禮拜而去。世尊。如是般若波羅蜜多。若有書寫受持讀誦。廣爲有情宣說流布。當知是處。恆有此土。并餘十方無邊世界。無量無數。天龍藥叉。健達縛。阿素洛。揭路荼。緊捺洛。莫呼洛伽。人非人等。皆來集會。設無說者。敬重法故。亦於是處。供養恭敬。尊重讚歎。禮拜而去。何以

故一切如來應正等覺及諸菩薩摩訶薩眾獨覺聲聞一切有情所有樂具皆依般若波羅蜜多而得有故佛設利羅亦由般若波羅蜜多功德熏修受供養故世尊甚深般若波羅蜜多與諸菩薩摩訶薩行及所證得一切相智爲因爲緣爲所依止爲能引發是故我說假使充滿此瞻部洲佛設利羅以爲一分書寫如是甚深般若波羅蜜多復爲一分此二分中我意寧取如是般若波羅蜜多世尊我若於此甚深般若波羅蜜多受持讀誦正憶念時心契法故都不見有諸怖畏相何以故世尊甚深般若波羅蜜多無相

無狀無言無說。由此般若波羅蜜多無相無狀無言無說。靜慮精進安忍淨戒布施波羅蜜多。廣說乃至一切相智亦無相無狀無言無說。世尊。若此般若波羅蜜多有相狀言說。非無相狀言說者。不應如來應正等覺。達一切法無相無狀無言無說。證得無上正等菩提。爲諸弟子說一切法無相無狀無言無說。世尊。由此般若波羅蜜多無相狀言說。非有相狀言說。是故如來應正等覺。達一切法無相無狀無言無說。證得無上正等菩提。爲諸弟子說一切法無相無狀無言無說。世尊。是故般若波羅蜜多。堪受天人阿素

浴等。以無量種上妙華鬘。乃至燈明。供養恭敬尊重讚歎世尊。若有於此甚深般若波羅蜜多。至心聽聞受持讀誦。精勤修學。如理思惟。廣爲有情宣說流布。或復書寫眾寶嚴飾。供養恭敬尊重讚歎。決定不復墮於地獄。傍生鬼界。邊鄙達絮。蔑戾車中。不墮聲聞及獨覺地。必趣無上正等菩提。常見諸佛。恆聞正法。不離善友。嚴淨佛土。成熟有情。從一佛國至一佛國。供養恭敬尊重讚歎。諸佛世尊。及諸菩薩摩訶薩眾。復次世尊。假使充滿於此三千大千世界。佛設利羅。以爲一分。書寫如是甚深般若波羅蜜多。復爲一分。

此二分中。我意寧取甚深般若波羅蜜多。何以故。世尊。一切如來應正等覺。及三千界佛設利羅。皆從般若波羅蜜多而出生故。又三千界佛設利羅。皆由般若波羅蜜多功德勢力所熏修故。得諸天人阿素洛等。供養恭敬尊重讚歎。由此因緣。諸善男子善女人等。供養恭敬尊重讚歎。佛設利羅。決定不墮三惡趣中。常生天人受諸富樂。隨心所願。乘三乘法而趣涅槃。世尊。若見如來應正等覺。若見所寫甚深般若波羅蜜多。此二功德。平等無異。何以故。甚深般若波羅蜜多。與諸如來應正等覺。平等無二。無二處故。世尊。

若有如來應正等覺。住三示導。爲諸有情宣說正法。所謂契經。乃至論議。若善男子善女人等。於此般若波羅蜜多。受持讀誦。廣爲他說。此二功德。平等無異。何以故。若彼如來應正等覺。若三示導。若所宣說。十二分教。皆依般若波羅蜜多。而出生故。世尊。若十方界。如菟伽沙一切如來應正等覺。住三示導。爲諸有情宣說正法。所謂契經。乃至論議。若善男子善女人等。於此般若波羅蜜多。受持讀誦。廣爲他說。此二功德。平等無異。何以故。若十方界。如菟伽沙一切如來應正等覺。若三示導。若所宣說。十二分教。皆依般若

波羅蜜多而出生故。世尊。若善男子善女人等。以無量種上妙華鬘。乃至燈明。供養恭敬。尊重讚歎。十方世界。如殞伽沙。一切如來。應正等覺。有善男子善女人等。書寫般若波羅蜜多。亦以無量上妙供具。供養恭敬。尊重讚歎。此二功德平等無異。何以故。彼諸如來。應正等覺。皆依般若波羅蜜多而出生故。世尊。若善男子善女人等。於此般若波羅蜜多。至心聽聞。受持讀誦。精勤修學。如理思惟。廣爲有情宣說。流布。彼當來世。不墮地獄。傍生。鬼界。不墮聲聞。及獨覺地。何以故。是善男子善女人等。決定當住不退轉地。遠離

一切災橫疾疫苦惱事故。世尊若善男子。善女人等。於此般若波羅蜜多。至心聽聞受持讀誦。精勤修學。如理思惟。書寫解說。廣令流布。以無量種上妙供具。供養恭敬。尊重讚歎。彼定永絕一切怖畏。如負債人。怖畏債主。卽便親近奉事國王。依王勢力得免怖畏。世尊。王喻般若波羅蜜多。彼負債人喻善男子善女人等。依恃般若波羅蜜多。得離怖畏。世尊。譬如有人。依附王故。王攝受故。爲諸世人供養恭敬。尊重讚歎。佛設利羅。亦復如是。由此般若波羅蜜多所熏修故。爲諸天人阿素洛等供養恭敬。尊重讚歎。世尊。王喻

般若波羅蜜多。佛設利羅喻依王者世尊。諸佛所得一切相智。亦依般若波羅蜜多而得成就。是故我說假使充滿此三千界佛設利羅。以爲一分。書寫如是甚深般若波羅蜜多。復爲一分。此二分中。我意寧取甚深般若波羅蜜多。何以故。世尊佛設利羅堅踰金剛。具種種色。及三十二大丈夫相。八十隨好。所莊嚴身。如來十力。四無所畏。四無礙解。大慈大悲大喜大捨。十八佛不共法。乃至如來一切相智。皆由般若波羅蜜多而成辦。故世尊由此般若波羅蜜多威神力。故布施等五。亦得名爲波羅蜜多。何以故。世尊若無

般若波羅蜜多。施等不能到彼岸故。復次世尊。若此三千大千世界。或餘世界。所有王都城邑聚落。其中若有受持讀誦。書寫解說。供養恭敬。尊重讚歎。如是般若波羅蜜多。是處有情。不爲一切人非人等之所惱害。唯除決定惡業應受。此中有情。漸次修學三乘正行。隨其所願。乃至速證三乘涅槃。世尊。如是般若波羅蜜多。於此三千大千世界。作大饒益。世尊。如是般若波羅蜜多。具大神力。隨所在處。則爲有佛。作諸佛事。所謂利樂一切有情。世尊。譬如無價大寶神珠。具無量種勝妙威德。隨所住處。有此神珠。人及非人。

無諸惱害。設有男子。或復女人。爲鬼所執。身心苦惱。若有持此神珠示之。由珠威力。鬼便捨去。諸有熱病。或風或痰。或熱風痰。合集爲病。若有繫此神珠著身。如是諸病。無不除愈。此珠在暗。能作照明。熱時能涼。寒時能暖。隨地方。所有此神珠。時節調和。不寒不熱。若地方處。有此神珠。蛇蝎等毒。無敢停止。設有男子。或復女人。爲毒所中。楚痛迷悶。若有持此神珠示之。珠威勢故。毒卽銷滅。若諸有情。身嬰癩疾。惡瘡腫疱。目眩翳等。眼病耳病。鼻病舌病。喉病身病。諸支節病。帶此神珠。眾病皆愈。若諸池沼泉井等中。其水濁穢。

或將枯涸。以珠投之水。便盈滿。香潔澄淨。具八功德。若以青黃赤白紅紫碧綠。襍綺種種色衣。裹此神珠。投之於水。水隨衣綵。各同其色。如是無價大寶神珠。威德無邊。歎不可盡。若置箱篋。亦令其器具足成就。無邊威德。設空箱篋。由曾置珠。其器仍爲眾人愛重。爾時慶喜。問帝釋言。如是神珠。爲天上有。人亦有耶。天帝釋言。人中天上。俱有此珠。若在人中。形小而重。若在上天。形大而輕。又人中珠。相不具足。在天上者。其相周圓。天上神珠。威德殊勝。無量倍數。過人所有。時天帝釋。復白佛言。世尊。甚深般若波羅蜜多。亦復

如是爲眾德本。能滅無量惡不善法。隨所在處。令諸有情身心苦惱悉皆除滅。人非人等不能爲害。世尊所說無價大寶神珠。非但喻於甚深般若波羅蜜多。亦喻如來一切相智。亦喻靜慮波羅蜜多。乃至布施波羅蜜多。亦喻內空乃至無性自性空。亦喻四念住。廣說乃至十八佛不共法。亦喻法性法住法定眞如。實際不思議界。何以故。世尊如是功德皆由般若波羅蜜多大威神力之所引顯。功德深廣無量無邊。佛設利羅。由諸功德所熏修故。佛涅槃後。堪受一切世閒天人阿素洛等。供養恭敬。尊重讚歎。復次世尊。佛

設利羅。是極圓滿最勝清淨般若波羅蜜多。乃至布施波羅蜜多。內空乃至無性自性空。四念住廣說。乃至十八佛不共法。一切智道相智一切相智。大慈大悲大喜大捨無忘失法恆住捨性。永斷煩惱習氣相續。及餘無量無邊佛法所依器故。佛涅槃後堪受一切世閒天人阿素洛等。供養恭敬尊重讚歎世尊。佛設利羅。是極圓滿最勝清淨功德珍寶波羅蜜多所依器故。堪受一切世閒天人阿素洛等。供養恭敬尊重讚歎世尊。佛設利羅。是極圓滿最勝清淨無染無淨無生無滅無入無出無增無減無來無去無動無

止。無此無彼。波羅蜜多所依器故。佛涅槃後。堪受一切世閒天人阿素洛等。供養恭敬。尊重讚歎。世尊。佛設利羅。是極圓滿最勝清淨。諸法實性。波羅蜜多所依器故。佛涅槃後。堪受一切世閒天人阿素洛等。供養恭敬。尊重讚歎。復次。世尊。置滿三千大千世界。佛設利羅。假使充滿十方各如。碗伽沙界。佛設利羅。以爲一分。書寫如是甚深般若波羅蜜多。復爲一分。此二分中。我意寧取如是般若波羅蜜多。何以故。世尊。一切如來應正等覺。諸設利羅。皆因如是甚深般若波羅蜜多。而得生故。皆由如是甚深般若波羅蜜多。

所熏修故。皆爲如是甚深般若波羅蜜多所依器故。堪受一切天龍藥叉健達縛阿素洛揭路荼緊捺洛。莫呼洛伽人非人等。供養恭敬尊重讚歎。世尊若善男子善女人等。供養恭敬尊重讚歎佛設利羅。天上人中受諸富樂無有窮盡。人中所謂刹帝利大族。婆羅門大族。長者大族。居士大族。天上所謂四大王眾天。乃至他化自在天。卽由如是殊勝善根。至最後身得盡苦際。世尊若善男子善女人等。於此般若波羅蜜多。至心聽聞受持讀誦書寫解說如理思惟。由此般若波羅蜜多。速得圓滿。如是般若波羅蜜多得圓。

滿故。復令靜慮波羅蜜多。乃至布施波羅蜜多。四念
住。廣說。乃至十八佛不共法。亦得圓滿。由此復能超
聲聞地。及獨覺地。證入菩薩正性離生。獲得菩薩殊
勝神通。乘此神通遊諸佛土。從一佛國至一佛國。供
養恭敬諸佛世尊。成熟有情。嚴淨佛土。發勝思願。受
種種身。爲欲饒益諸有情故。或作轉輪王。或作餘小
王。或作刹帝利。或作婆羅門。或作毗沙門。或作天帝
釋。或作梵王。或作餘類。利益安樂無量有情。是故世
尊。我於諸佛。設利羅所。非不信受。非不欣樂。供養恭
敬。尊重讚歎。然於如是甚深般若波羅蜜多。供養恭

敬尊重讚歎。所獲功德甚多於彼。由此因緣。我意寧
取甚深般若波羅蜜多。世尊。若善男子善女人等。供
養恭敬尊重讚歎如是般若波羅蜜多。則爲增長一
切佛法。亦爲攝受世出世間富樂自在。如是已爲供
養恭敬尊重讚歎佛設利羅。復次世尊。若有欲得常
見十方無量無數無邊世界。一切如來應正等覺。色
身法身。當於如是甚深般若波羅蜜多。至心聽聞受
持讀誦。精勤修學。如理思惟。書寫解說。廣令流布。彼
見十方無量無數無邊世界。一切如來應正等覺。二
種身故。漸修般若波羅蜜多。令速圓滿。是時應以法

性。修習觀佛隨念。世尊法性有二。二者有爲。二者無爲。此中何謂有爲法性。謂內空智乃至無性自性空智。四念住智乃至八聖道支智。三解脫門智。佛十力智。乃至十八不共法智。善非善法智。有記無記法智。有漏無漏法智。有爲無爲法智。世閒出世閒法智。裸染清淨法智。諸如是等無量門智。皆悉說名有爲法性。此中何謂無爲法性。謂一切法無生無滅。無住無異。無染無淨。無增無減。無相無爲。諸法自性。云何名爲諸法自性。謂一切法無性自性。如是說名無爲法性。爾時佛告天帝釋言。如是如是。如汝所說。憍尸

迦。過去未來現在諸佛。皆依般若波羅蜜多。已證當證。現證無上正等菩提。過去未來現在諸佛。聲聞弟子。皆依般若波羅蜜多。已得當得。現得預流。一來不還。阿羅漢果。過去未來現在獨覺。皆依般若波羅蜜多。已當現證。獨覺菩提。何以故。憍尸迦。如是般若波羅蜜多。祕藏中。廣說三乘相應法故。然此所說。以無所得爲方便故。無性無相爲方便故。無生無滅爲方便故。無染無淨爲方便故。無造無作爲方便故。無入無出爲方便故。無增無減爲方便故。無取無捨爲方便故。如是所說。皆由世俗非勝義故。所以者何。如

是般若波羅蜜多。非此岸。非彼岸。非陸地。非中流。非高。非下。非平等。非不平等。非有相。非無相。非世間。非出世間。非有漏。非無漏。非有爲。非無爲。非善。非不善。非有記。非無記。非過去。非未來。非現在。憍尸迦。如是般若波羅蜜多。不與佛法。不與菩薩摩訶薩法。不與獨覺法。不與聲聞法。亦不棄異生法。時天帝釋。復白佛言。世尊。如是般若波羅蜜多。是大波羅蜜多。是無上波羅蜜多。是無等等波羅蜜多。諸菩薩摩訶薩修行。如是波羅蜜多時。雖知一切有情心行境界差別。而不得我。不得有情。乃至不得知者見者。不得色。乃

至識。不得眼。乃至意。不得色。乃至法。不得眼識。乃至意識。不得眼觸。乃至意觸。不得眼觸爲緣所生諸受。乃至意觸爲緣所生諸受。般若波羅蜜多。不得內空。乃至無性自性空。不得四念住。廣說。乃至十八佛不共法。不得菩提。不得涅槃。不得諸佛及諸佛法。何以故。世尊。非此般若波羅蜜多。於一切法。依有所得。而出現故。所以者何。甚深般若波羅蜜多。都無自性。亦無所有。亦不可得。能得所得。及二依處。性相皆空。不可得故。爾時佛告天帝釋言。如是如是。如汝所說。憍尸迦。諸菩薩摩訶薩。長夜

修學甚深般若波羅蜜多。尚不得菩薩。況得菩薩法。爾時天帝釋。白佛言。世尊。諸菩薩摩訶薩。爲但行般若波羅蜜多。亦行餘五波羅蜜多耶。佛言。憍尸迦。諸菩薩摩訶薩。以無所得而爲方便。具行六種波羅蜜多。謂諸菩薩摩訶薩。修行布施波羅蜜多時。不得布施波羅蜜多。不得施者及能受者。修行淨戒波羅蜜多時。不得淨戒波羅蜜多。不得持戒及犯戒者。乃至修行般若波羅蜜多時。不得般若波羅蜜多。不得具妙慧及具惡慧者。復次憍尸迦。諸菩薩摩訶薩。甚深般若波羅蜜多。爲尊爲導。修行一切波羅蜜多。令速

圓滿。是菩薩摩訶薩行布施時。甚深般若波羅蜜多。爲尊爲導。所修布施波羅蜜多。無所執著。速得圓滿。乃至行般若時。甚深般若波羅蜜多。爲尊爲導。所修般若波羅蜜多。無所執著。速得圓滿。復次憍尸迦。是菩薩摩訶薩。於一切法。以無所得而爲方便。修行般若波羅蜜多。故無執著。令所修行。速得圓滿。謂於色無所得。爲方便。乃至於一切相智。無所得。爲方便。憍尸迦。如瞻部洲。所有諸樹。枝條莖幹。花葉果實。雖有種種形色不同。而其蔭影。都無差別。如是前五波羅蜜多。雖各有異。而由般若波羅蜜多。攝受回向一切。

相智。以無所得爲方便故。諸差別相都不可得。時天帝釋復白佛言。世尊。如是般若波羅蜜多。成就廣大殊勝功德。成就一切殊勝功德。成就圓滿殊勝功德。成就無量殊勝功德。成就無數殊勝功德。成就無邊殊勝功德。成就無等殊勝功德。世尊。若善男子善女人等。書持如是甚深般若波羅蜜多。眾寶嚴飾。以無量種上妙供具。供養恭敬。尊重讚歎。依此經說如理思惟。有善男子善女人等。書寫如是甚深般若波羅蜜多。施他受持。廣令流布。此二福聚。何者爲多。佛言。憍尸迦。我還問汝。當隨意答。若善男子善女人等。從

他請得佛設利羅。盛以寶函置高勝處。復持無量上妙華鬘。乃至燈明。供養恭敬。尊重讚歎。有善男子。善女人等。從他請得佛設利羅。分施與他。如芥子許。令彼敬受。如法安置。復以種種上妙花鬘。乃至燈明。供養恭敬。尊重讚歎。於意云何。此二福聚。何者爲勝。天帝釋言。如我解佛所說義者。此二福聚。後者爲勝。何以故。以諸如來。應正等覺。觀有情類。應於諸佛設利羅所。供養恭敬而得度者。將涅槃時。以金剛喻三摩地。力碎金剛身。令如芥子。復以深廣大悲神力。加持如是佛設利羅。令於如來般涅槃後。有得一粒如芥

子量。供養恭敬。獲福無邊。於天人中受多富樂。乃至最後得盡苦際。故施他者其福爲勝。爾時佛讚天帝釋言。善哉善哉。如汝所說。憍尸迦。於此般若波羅蜜多。亦復如是。若自受持。施他流布。此二福聚。後者爲多。何以故。由施他者。能令無量無邊有情得法喜故。復次憍尸迦。若有於此甚深般若波羅蜜多。所說義趣。如實爲他分別解說。令得正解。所獲福聚。復勝施他流布功德。多百千倍。憍尸迦。敬此法師。當如敬佛。亦如似佛。尊重大智同梵行者。何以故。憍尸迦。當知般若波羅蜜多。卽是諸佛。當知諸佛。卽是般若波羅

蜜多。當知般若波羅蜜多。不異諸佛。當知諸佛。不異般若波羅蜜多。所以者何。三世諸佛。皆依般若波羅蜜多。精勤修學。證得無上正等菩提。若諸聲聞。獨覺種性。修梵行者。亦依般若波羅蜜多。精勤修學。得聲聞果。獨覺菩提。菩薩種性。補特伽羅。亦依般若波羅蜜多。精勤修學。超諸聲聞。及獨覺地。證入菩薩正性離生。漸次修行。諸菩薩行。得住菩薩不退轉地。以是故。憍尸迦。若善男子。善女人等。欲得現前。供養恭敬。尊重讚歎。諸佛世尊。當書如是。甚深般若波羅蜜多。供養恭敬。尊重讚歎。憍尸迦。我觀是義。初成佛時。作

是思惟。我依誰住。誰堪受我供養恭敬。作是念時。都不見有諸天魔梵。及餘世閒人非人等。與我等者。況當有勝。復自思惟。我依此法。已證無上正等菩提。此法甚深微妙寂靜。我當還依此法而住。供養恭敬。所謂般若波羅蜜多。憍尸迦。我已成佛。尚依般若波羅蜜多。供養恭敬。況善男子善女人等。欲求無上正等菩提。而不依此甚深般若波羅蜜多。精勤修學。供養恭敬。尊重讚歎。何以故。憍尸迦。甚深般若波羅蜜多。能生菩薩摩訶薩眾。從此菩薩摩訶薩眾。生諸如來。應正等覺。依諸如來。應正等覺。聲聞獨覺。而得生故。

以是故。憍尸迦。若菩薩乘。若獨覺乘。若聲聞乘。諸善男子。善女人等。皆於般若波羅蜜多。應勤修學。以無量種上妙華鬘。乃至燈明。供養恭敬。尊重讚歎。

大般若波羅蜜多經卷第四百三十

音釋

芬馥 芬敷文切馥房六切芬馥香氣也 達絮 梵語也此謂微信佛法之人絮息據切

蔑戾車 梵語也亦云彌離車此云惡見蔑彌列切戾力霽切 痰 音談病液也 蛇蝎

蝎音歇 嬰 一盈切也 癩 音賴惡疾也 腫疱 腫主勇切脹也 疔 疔疔切氣泡也

也 眩翳 眩熒絹切目無常主也翳於計切障也 枯涸 涸曷各切水枯竭也 箱篋

箱息良切竹器也 莖榦 莖何耕切枝柱也榦居案切木旁生者為枝正出者

爲
榦

大般若波羅蜜多經卷四百三十

四十三

麗十

